

**I** FLETËUDHËZUES I PAKETIMIT:  
Informacion për përdoruesin

## TETRACIKLINE

Pomadë – 3%

### TETRA

Pomadë për sy – 1%  
(Tetraciklinë klorhidrat)

Lexojeni me kujdes këtë fletëudhëzues përpara se të filloni përdorimin e barit.

- Ruajeni këtë fletëudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore keqësohet ose në qoftë se vëreni ndonjë efekt tjetër anësor që nuk përmendet në këtë fletëudhëzues, ju lutemi të njoftoni mjekun ose farmacistin tuaj.

Në këtë fletëudhëzues:

- Çfarë është Tetracikline ose Tetra dhe përse përdoret
- Përpara se të përdorni Tetracikline ose Tetra
- Si ta përdorni Tetracikline ose Tetra
- Efekte anësore të mundshme
- Si ta ruani Tetracikline ose Tetra
- Informacion i mëtejshëm

#### 1. ÇFARË ËSHTË TETRACIKLINE OSE TETRA DHE PËRSE PËRDORET

Tetracikline ose Tetra përmban si lëndë vepruese tetraciklinë klorhidrat.

Tetraciklina është një derivat gjysmësintetik i klortetraciklinës. Ajo ka veprim bakterostatik si pasojë e frenimit të rikthyeshëm të ribozomit mikrobik dhe të sintezës së proteinave. Lokalisht, tetraciklina tregohet efikase në trajtimin e infeksioneve të vogla të lëkurës të shkaktuara nga streptokokët, stafilokokët dhe baktere të tjera të ndjeshme. Tetraciklina vepron mirë mbi shkaktarin e trakomës (Chlamydia trachomatis).

Tetracikline pomadë 3%, 15 g përdoret në:

- ulçeracione të infektuara të dermës;
- akne vulgaris;
- infeksione bakteriale në lëkurë dhe indet e buta (trajtim dhe profilaksi);
- gërvishtje, plagosje ose kafshime nga kafshët si mace, qen ose pickim nga insektet, për parandalimin e zhvillimit të infeksionit.

Tetra pomadë për sy 1%, 5 g përdoret në:

- trajtimin e infeksioneve sipërfaqësore bakteriale të kornesë së syrit dhe konjunktivit të syrit;
- parandalimin e oftalmisë neonatorum;
- trajtimin e trakomës.

Pas një përdorimi të zgjatur të tetraciklinës, mund të keni shfaqjen e rezistencës nga mikroorganizmat.

#### 2. PËRPARA SE TË PËRDORNI TETRACIKLINE OSE TETRA

Mos përdorni Tetracikline ose Tetra në qoftë se:

- jeni i ndjeshëm (alergjik) ndaj tetraciklinës ose ndaj ndonjërit prej përbërësve të tjerë të pomadës oftalmike ose pomadës dermatologjike (reaksionet e mbindjeshmërisë janë më të shpeshta në të sëmurët astmatikë);
- jeni shtatzënë ose në periudhën e ushqimit me gji.

Tetra - pomadë për sy nuk rekomandohet të kombinohet me terapi oftalmike kortikosteroidesh. Ky kombinim mund të fshehë shenjat klinike të infeksioneve bakteriale, virale ose fungale.

Tregoni kujdes të veçantë me Tetracikline ose Tetra Pyesni mjekun tuaj përpara se të përdorni Tetracikline ose Tetra.

- Konsultohuni me mjekun tuaj për përdorimin e pomadës oftalmike dhe dermatologjike tek fëmijët.
- Pomada dermatologjike nuk duhet aplikuar në sy.
- Lejohet përdorimi i pomadës dermatologjike Tetracikline në fëmijët e moshës mbi 8 vjeç.
- Kundërintikohet përdorimi i saj për kohë të gjatë dhe në sasi të mëdha.
- Përdorimi i antibiotikut mund të shkaktojë zhvillimin e mikroorganizmave patogjene, prandaj i sëmuri duhet monitoruar me kujdes. Në qoftë se gjatë mjekimit shfaqet një infeksion i ri, duhen marrë masa të përshtatshme.
- Pomada 3% - 15 g si pomadë dermatologjike nuk mund të përdoret në mukozën e hundës, të gojës ose në sy.
- Pomada oftalmike 1% - 5 g përdoret vetëm në sy dhe jo në mukozën e gojës dhe të hundës.

Marrja e barnave të tjera:

Trajtimi i njëkohshëm me barna të tjera mund të ndikojë ose të ndikohet nga Tetracikline ose Tetra.

Njoftoni mjekun ose farmacistin tuaj në qoftë se jeni duke marrë / përdorur, keni marrë / përdorur së fundmi ose mund të merrni / përdorni barna të tjera, përfshirë ato të marra pa recetë. Është veçanërisht e rëndësishme që mjeku juaj të jetë në dijeni të faktit që ju jeni duke u trajtuar me:

- rezorcinol;
- peroksid benzoili;
- acid salicilik.

Të gjitha këto shtojnë efektet irrituese në lëkurë.

**Marrja e Tetraciklinë ose Tetra me ushqim dhe pije**  
Duhet patur parasysh rregullat e higjienës personale dhe moskonsumimi i ushqimeve dhe i pijeve me duar të lyera me Tetracikline – pomadë dermatologjike. Në kushtet e një higjienë personale perfekte, nuk ka ndikim marrja e ushqimit dhe konsumimi i pijeve gjatë periudhës së mjekimit me pomadë dermatologjike dhe oftalmike (aplikim lokal).

Shtatzënia

Ky bar mund të përdoret gjatë shtatzënisë vetëm në rastin kur nevoja për të e tejkalon riskun ndaj të cilit ekspozohet fetusit dhe nëna. Trajtimi me tetraciklinë i nënave shtatzëna dëmton vazhdimisht dhëmbët.

Ushqyerja me gji

Kundërintikohet trajtimi me tetraciklinë gjatë ushqimit me gji të fëmijës, pasi tetraciklina edhe pse administrohet lokalisht, akumulohet në qumështin e gjirit dhe jashtëqitet me qumështin, prandaj nënat që ushqejnë fëmijën me gji nuk duhet të përdorin tetraciklinë, përveç rasteve kur nevoja për të e tejkalon riskun ndaj të cilit ekspozohet fëmija. Nga përdorimi i tetraciklinës gjatë ushqimit me gji, mund të ndodhë dekolorimi i dhëmbëve te fëmijët. Kërkonti këshillën e farmacistit ose të mjekut përpara se të përdorni këtë bar.

**Drejtimi i automjetit dhe përdorimi i makinerive**  
Tetracikline pomadë 3% nuk ka ndikim mbi aftësinë për të drejtuar automjetin dhe përdorur makineritë. Si të gjitha barnat që aplikohen në sy, edhe Tetra pomadë për sy 1% mund të shkaktojë turbullim të përkohshëm të shikimit ose çrregullime të tjera të shikimit, të cilat mund të ndikojnë në aftësinë për të drejtuar automjetin ose përdorur makineri. Nëse ndodh turbullimi i shikimit, duhet të prisni deri në qartësimin e plotë të tij përpara se të drejtoni automjetin ose përdorni makineri.

**Informacion i rëndësishëm për disa nga përbërësit e Tetracikline ose Tetra**  
Tetracikline pomadë 3% përmban metilhidroksibenzoat (nipaginë) dhe propilhidroksibenzoat (nipazol), që mund të shkaktojnë reaksione alergjike (ndoshta të vonuara). Tetra pomadë për sy 1% përmban metilhidroksibenzoat (nipaginë), i cili mund të shkaktojë reaksione alergjike (ndoshta të vonuara).

**3. SI TA PËRDORNI TETRACIKLINE OSE TETRA**  
Gjithmonë Tetracikline ose Tetra përdoret ekzakhtësisht si ju thotë mjeku juaj. Duhet të konsultoheni me mjekun ose farmacistin tuaj në qoftë se nuk jeni i sigurt.

**Tetracikline pomadë 3%, 15 g**  
Pas pastrimit të lëkurës, aplikohet lokalisht në shtresë të hollë 2 herë në ditë. Pomada përhapet lehtësisht me mollëzën e gishtit deri sa të mos duket. Në infeksionet bakteriale të lëkurës nevojitet mjekim deri në 1 javë ndërsa në akne deri 3 javë (në format e lehta dhe mesatare mjafton mjekimi lokal ndërsa në format e rënda, mjekimi lokal mund të kombinohet me marrjen e tabletave nga goja, 1.5 g / ditë e ndarë në 3 pjesë që merren 1 orë para ose 2 orë pas ushqimit).

**Tetra pomadë për sy 1%, 5 g**  
*Për trajtimin e infeksioneve bakteriale dhe trakomës:*  
Pomada për sy (1%) aplikohet rreth 1 cm në konjunktivë, çdo 2-4 orë.

*Për trajtimin e oftalmisë neonatorum:*  
Aplikohet një dozë e vetme pomadë (1 cm).

Fillimi i mjekimit dhe ripërsëritja e tij duhet të bëhet vetëm pas një ekzaminimi të kujdesshëm të të sëmurit nga mjeku specialist nëpërmjet kontrollit me biomikroskop etj. Nëse mjekimi zgjat mbi 10 ditë duhet kontrolluar presioni intraokular.

Për administrimin e Tetra pomadë për sy 1% ndiqni udhëzimet e mëposhtme:

- Lajini mirë duart.
  - Maja e tubetit të mos bjerë në kontakt me qerpikët, konjunktivën, lëkurën, gishtërinjtë ose sipërfaqe të tjera.
  - Mos e prekni vendin e daljes së pomadës.
  - Shikoni lart.
  - Ulni kapakun e poshtëm të syrit për të krijuar një ulluk.
  - Vendosni majën e tubetit sa më afër ullukut, por pa e prekur atë.
  - Hidhni sasinë e duhur në ulluk.
  - Mbyllni syrin për rreth 2 minuta.
  - Përdorimi i të njëjtit tubet në më shumë se një të sëmurë mund të bëhet shkak për të shpërndarë infeksionin.
- Preparati duhet të mbahet i mbyllur në kohën kur nuk përdoret, sepse kur nuk tregohet kujdesi i duhur, mund të kontaminohet dhe të shkaktojë infeksione të syrit të cilat bëhen shkak për dëmtime serioze të syrit dhe të shikimit.

**Në qoftë se keni përdorur më shumë Tetracikline ose Tetra**  
Tetraciklina përthithet mirë nga lëkura kur përdoret lokalisht prandaj duhet të tregohet kujdes që të mos përdoret me sasi të mëdha sepse mund të shkaktojë irritime të lëkurës edhe djegie të saj. Në qoftë se keni përdorur më shumë Tetracikline ose Tetra se sasia që duhet të përdornit, ose në qoftë se fëmijët e kanë marrë gabimisht këtë bar, ju lutemi të kontaktoni mjekun tuaj, spitalin, ose të telefononi urgjencën për të marrë një mendim për rrezikun dhe këshillë për veprimet që duhet të ndërmerren.

**Në qoftë se keni harruar të përdorni Tetracikline ose Tetra**  
Në qoftë se harroni aplikimin e një doze (ose më shumë dozave), aplikoni dozën në vazhdim kur të jetë koha për aplikimin e zakonshëm të saj. Mos aplikoni një dozë të dyfishtë (ose më të lartë) për të plotësuar dozën (dozat) e harruar(a). Në qoftë se keni pyetje të mëtejshme mbi përdorimin e këtyre produkteve, pyesni mjekun ose farmacistin tuaj.

**4. EFEKTE ANËSORE TË MUNDSHME**  
Si të gjithë barnat e tjerë, Tetracikline ose Tetra mund të shkaktojë efekte anësore, megjithëse jo çdokush i manifeston. Pjesa më e madhe e efekteve anësore janë të lidhura me dozën dhe zhduken kur doza reduktohet ose trajtimi ndërpritet. Disa efekte anësore mund të ndodhin në fillim të trajtimit dhe zhduken në mënyrë spontane me vazhdimin e mjekimit.

Disa efekte anësore të mundshme të Tetracikline pomadë 3% janë:

- ngjyrosje e lëkurës në vendin e përdorimit, por njolla pastrohet me larje;
- fluoreshencë e vendeve të trajtuara nga rrezet ultraviolet;
- irritim, kruarje, skuqje, djegie ose edema në vendin e aplikimit;
- shumë rrallë dermatit;
- në të sëmurët me insuficiencë renale, nëse mjekimi lokal plotësohet me dhënien e dozës së plotë nga goja, mund të shkaktohen dëmtime të mëlçisë.

**Tetra pomadë për sy 1%, 5 g:**

- irritim, kruarje dhe djegie të kapakëve të syve;
- mund të shkaktojë çrregullime të shikimit.

**5. SI TA RUANI TETRACIKLINE OSE TETRA**  
Mos e përdorni barin pas datës së skadimit e cila është e shënuar në paketim. Ruajeni në paketimin origjinal për ta mbrojtur nga drita. Të ruhet në një vend të freskët, nën 25°C! Të mbahet larg fëmijëve.

**6. INFORMACION I MËTEJSHËM**  
**Çfarë përmban Tetracikline pomadë 3%, 15 g**  
**Lënda aktive** është tetraciklinë klorhidrat. 1 g pomadë përmban 30 mg tetraciklinë klorhidrat. **Përbërës të tjerë:** vazelinë, vaj vazeline, dioksid silici koloidal, metilhidroksibenzoat (nipaginë) dhe propilhidroksibenzoat (nipazol).

**Çfarë përmban Tetra pomadë për sy 1%, 5 g**  
**Lënda aktive** është tetraciklinë klorhidrat. 1 g pomadë për sy përmban 10 mg tetraciklinë klorhidrat. **Përbërës të tjerë:** vazelinë, vaj vazeline dhe metilhidroksibenzoat (nipaginë).

**Përmbajtja e paketimit**  
Tetracikline pomadë 3%: kuti me 1 tubet 15 g. Tetra pomadë për sy 1%: kuti me 1 tubet steril 5 g.

**Mbajtësi i Autorizimit për Tregtim dhe Prodhuesi:**

 **PROFARMA** sh.a.,  
Rruga “Skënder Vila”,  
Tiranë, Shqipëri.  
Tel.: +355 4 23 89 602

**Ky fletëudhëzues u rishikua për herë të fundit në Dhjetor 2023.**